


Inches
Centimetres
TIFFEN Color Control Patches

© The Tiffen Company, 2007

21.06
7.50
5.15




明詩紀事

陶成一首

丁籤

成字孟學寶應人成化辛卯舉人

圖繪寶鑑續纂孟學白號雲湖仙人畫山水多用青
綠尤喜作釣勒竹兔與鶴鹿皆妙
無聲詩史孟學骯髒不羈有米南宮郭忠恕之風而
豪蕩過之
靜志居詩話雲湖寫人物山水最工予嘗從喬侍讀
子靜處見之歎為絕品凌谿其女婿也計借入都雲
湖語之曰問張家灣某氏丁香花盛開子盍隨我觀
乎凌谿云去禮部試僅三日公無往雲湖不許明且
凌谿他避雲湖乘筏輿徑去醉主人家五日榜發凌
谿中式比還鄉人醵錢賀凌谿雲湖於席上畫丁香
一本尤妙絕洵曠達之士也



遊白雲觀

珠箔沈沈護曉霞人間何處有仙家紫簫吹上瑤臺月丹氣
蒸開玉洞花一路和風回細草兩溪新漲浸平沙遊觀不盡
登臨興引領天門步日斜

豐坊 六首

坊字存禮鄆人嘉靖癸未進士除禮部主事諫大禮
受杖改南吏部主事謫通州判官以吏議免坐法竄
吳中改名道生字人翁有南禺集

芝園定集南禺質稟靈奇才彰卓詭論事則談鋒橫
出摘詞則藻撰立成九流百家罔不涉其津涯七步
入義未足誇其捷麗士林擬之鳳毛藝苑方諸逸駟
然而性不諧俗行或驚中片語合意輒出肺肝相唱
睚毗蒙嗔即援矛戟交刺亦或譽嫖母為嬋娟斥蘭
荃為蕢菜旁若無人罕所顧忌知者以為激詭不知

者以為誕罔也繇是雌黃間作轉相詆譏出有爭席
之夫居無式閭之敬鵝衣藍縷濕突不炊童奴絕粒
而通亡賓客過門而不入竟顧領以終其身悲夫
藝苑厄言豐道生詩如沙苑馬駑駿相半恣情馳騁
中多敗蹶

詹氏小辨南禺外史為人逸出法紀外而書學極博
五體並能諸家自魏晉以及國朝靡不兼通規矩盡
從手出蓋工於執筆者也以故其書大有腕力特神
韻稍不足

書史會要豐坊草書自晉唐而來無今人一筆態度
唯喜用枯筆乏風韻耳
孫鑛書畫跋跋余生平見南禺草書甚多皆精勁有
古法臨古帖尤妙唐元卿稱為我朝第一
列朝詩集存禮高才博學下筆數千言立就於十三
經皆別為訓詁新索累每託名古本或外國本今
所傳石經大學子黃詩傳皆其偽撰也家藏古碑刻
甚富臨摹亂真為人譏定法書以真易贗不可窮詰
為人狂誕傲僻縱口狗意所至人畏而惡之常要邑
子沈嘉則具盛饌結忘年交相得甚驩或問之曰是
嘗姍笑公詩即大怒設醮上章詛之上帝所詛凡三

等一為首三等鼠蠅蚊蚤虱其狂易可笑皆此類也
則為首三等鼠蠅蚊蚤虱其狂易可笑皆此類也

爾上者舊集世廟議崇興獻禮人翁與父學士熙同
哭諫受杖闕下學士既沒成所人翁復言其父前諫
大禮非出本意因走京師上書請崇獻皇宜稱宗祀
太廟相高主其議上從之然人翁竟不得錄用歸益
自誕放詩深合古法雖時寫牢騷殊未盡其狂也
田按南馬工書於時人中惟文徵仲祝枝山陸子淵
稍見許可而於馬一龍沈愷王逢元陳鶴楊珂沈仕
皆痛詆醜擬不遺餘力其評沈仕書云如夏四倚主
夏四乃時相貴溪幹僕一時氣燄張甚其滑稽玩世
類此余謂南馬以議禮背父附和時局悖甚然於承
陵君也以視當時之趨承貴溪分宜者不稍愈乎詩
亦激宕凌厲寫其牢騷不平之氣才人不得志大抵
類此不足怪也

獨漉篇

上天陰陰雲多風疾風疾尚可雲多蔽日野狐哀鳴求匹于
藪我欲殪之念其無友文彪微絜爪牙無施我心懷憤與之
同悲魚潛淵不見其形悲歌躑躅孰知我情黃鳥翩翩在

彼江涯凌風一舉燕雀安知

雜詩

孤松挺穹壁下臨萬里波激湍嚙其根驚颯撼其柯紛紛穴
赤蟻裊裊纏青蘿羣攻未云已生意當如何嚴霜一夕墜高
標復嵯峨君子固窮節感慨成悲歌

病馬行贈少宰何燕泉

路傍病馬棄不收乃是天上真驂騮君王玄默罷遠遊爾輩
逸氣空橫秋憶昔山西戰爭起嫖姚手提三尺水夜半傳呼
振鐵衣材官十萬同殊死此時銀鞍出塞行甲光一道如流
星宵突重圍忽拉解晨馳厚陣皆奔崩歸來步向丹闕東圍
人太僕俱動容卻疑房宿觸地裂百仞躍出悲泉龍茂陵蕭

蕭土花碧王良既死誰復惜非關暫蹶損前功端爲一鳴終
見斥陰陰高高入荒昏灑淚不到長安塵日落荒城鳥棲背
天明野田霜滿身聞說胡窺白登道邊人被殺如刈草用爾
豈無騰驤力冉冉年華坐垂老出門偶見令我哀買骨誰置
千金臺試問天閑十二駟卽今未必非駑材

清明日

驟雨清明日繁花生欲飛流年兼病長客舍獨春歸東海稀
魚雁西山富蕨薇何當出游衍長此謝陰霏

晚秋遣懷

身世真相棄清貧久自忘蒼苔緣破屋黃葉滿空牀飯借僧
厨米燈分佛殿光猶餘五經笥一任鬢爲霜

己巳人日卽事

春霧蒙花柳春禽語屋檐絕糧長獨榻避世只空簾藥餌貧
難致文章老更耽亦知立覆瓿千載俟桓譚

王寵二十首

寵字履仁更字履吉吳人以諸生貢入太學有雅宜

山人集十卷

國寶新編王履吉清夷廉曠與物無競人擬之黃叔
度詩辭刻尙風骨擺脫輕靡陶鎔李杜汰滌情文既
正體裁復滅蹊徑可謂後來之高足惜乎天不假年
進而未止學士觀其汗血可也行書疏秀出塵頗得

晉法

晉臺集山人詩才力雄闊辭篇麗瞻去輕靡而就沈
著尙鋪綴而略陶鎔又白雀諸篇興寄冲立思調清
逸遂窺陶謝之堂幾入王孟之室
甫田集王君風儀玉立舉止軒揭讀書石湖之上偃
息長林豐草間含曠賦詩倚席而歌邈然有子載之

思續吳先賢讚吳書學自宋克祝允明逮王寵皆名得
 魏晉法寵所為詩與文徵明相若而格少尚之
 藝苑厄言王履吉詩如鄉少年久遊都會風流詳雅
 而不盡脫本來面目又似揚州大宴雖雖珍水陸而
 時有宿味
 四友齋叢說文衡山之後當以王雅宜為第一蓋其
 書本於大令兼之人品高曠故神韻超絕迥出諸人
 之上雅宜詩清警絕倫無一點塵俗氣真所謂天上
 謫仙人也所欠者沈著耳
 六硯齋筆記王履吉不以畫名偶然興到隨筆點染
 深得大癡雲林墨外之趣可見高人胸中無所不能
 無聲詩史雅宜山人書法出入晉唐詩亦清新絕俗
 作畫仿黃子久蒼秀處不減徵仲嘗自題云遠岸疏
 林斜日外春風碧水草堂前匡廬突兀開屏障坐看
 銀河一道懸
 明詩選李舒章曰履吉風華熒熒自有駿骨陳臥子
 曰履吉中首山詩追蹤顏光祿
 列朝詩集王履吉初學於蔡九達其後遊邊顧之間
 駸駸改轍而北
 明詩別裁履吉圭臬顏謝痕迹未融然爾時吳中詩
 格以履吉為最七言律亦頗沈鬱或者必以摹古短

之何也
 田按履吉五古步趨顏謝亦時希踪左阮固是吳中
 俊特其贈邊太常詩云中州兩龍奮東魯一鳳摩傾
 倒李何與邊至矣牧齋北轍之論是履吉得力處不
 得以此訾議

還山作

恭承休明日九軌今一家進則縮龜玉退則蟄龍蛇吾道苟
 不虧安用事咄嗟山川日閒曠土風頗清嘉躡步陵絕峴流
 目玩歸霞鳴嚶嚶以豫楊林蕙漸花風光枝上汎日采水中
 華感物眷彌結悟空理已遐永言詠玄寂聊以遣紛拏

過石公山

島嶼屢崩奔石林突參錯朝雲正吐秀冬水亦漸涸槎牙熊
 豹蹲蜷曲蛟龍蟄波濤激中洞嵐靄紛上薄金膏赤日流石

鏡青天霽表靈徵名圖延賞諸幽諾蒼鼠不驚人丹楓時自
落茲焉可投綸畢志甘場藿

入銷夏灣

千山翫迴轉雙闕開嶙峋圍作玉鏡潭流水桃花春雞犬白
甲子衣冠乃秦民表裏重湖阻丹青四望勻孤風表日觀羣
嶂摩天垠波光別駘蕩霞采相鮮新疑觴西王池誤攀織女
津海鷗戲蘭薄游儵瑩心神牙橋悲昔年玉輦罷今巡榮華
無常玩山水有天眞塵纓聊以濯慚爾樵歌人

曲巖

乘雲歛先登攀崖紛廣眺孤峯上寒日平楚騰餘燒天高風
物緊地迴山川竅饑歸仁陸梁哀鴻相叫嘯企石揖雲帆披

霞迎海嶠空水共汎瀾虛無自余照林深養谷神壁仄團景
曜光風爛芝苓玉髓滋蘿蔦樵隱自夷猶末路多奔峭懷哉
由里公千春可同調

送錢太常元抑祠祭顯陵

江漢朝百靈絳節集鄴郢興國奠其陽虹蜺熠光景象設開
天庭環衛森五嶺齋房產靈芝玉醴出金井神遊駕虛無劍
鳥存遺影灑埽祠官虔七鬯皇情耿太常典秩宗精白一心
秉龍顏授玉冊殿上親祇頌文端佩衝牙陟降瑤壇靜風清
靈旗翻天赤御氣罔宗禋日輝光松柏載崇整山河扶棟梁
虎旅肅藩屏還軺告成命弭節爲俄頃備聞古夔龍密布金
華省彷彿弘治風廷論多骨鯁我輩飽藜羹散髮從箕穎

月夜登上方絕頂

乾坤一銀海萬境羣動滅狂殺王子猷疑是山陰雪披襟當
雄風酒後覺耳熱山精忽夜嘯谷響崖竹裂恂恂非人間身
世殊陔絕結東昇天行星斗爲珮玦倒窺山河影嗟峨鏡中
列始知飛仙人五嶽視邱垤紫霧何濛濛入口皆玉屑幾時
丹砂成白日翔鸞節

送陳子齡會試

夙昔卧林壑與子多緒言方軌共行遊遊彼竹素園古人不
可作志節照當年垂爲日星文流爲河漢源中夜撫枕嘆思
與比翼騫龍淵不在握壯志成煩寃日月忽我適荃蕙甯久
繁努力愛光景及子朝陽暉鳥飛不厭高獸挺各爭先策足

據要津慰我孤窮魂

分得滕王閣送盧駕部師陳

江漢紀南服衡廬奠朱方河山阻襟帶表裏望荆襄列雉鬱
參錯樹羽盡飛揚風清彭蠡瀨雲起昭邱陽帝子握龍節磐
石荒楚疆中天抗瑤榭倒景垂虹梁鳴鑾謝千載遺構想靈
光夫君勸王事流覽恣方羊霜淒百卉素日落千山蒼悼古
志恂恂遭時氣騰驥北首報明主端笏拱巖廊

渡江望金山

肅船泝洪濤挂席展奇峒頗懷濟川人復羨臨濠樂茲山絕
地脈江海秀磅礴突起無曼延冲流自灑瀉太華巨靈擘龍
門神禹鑿嶮峭由代工位置非天作仰干斗牛精俯枕川藪

絡中虛釀靈潤外觀表封略樓宇盡騫騰嵐翠紛沃若潮音
雜鐘梵人語怒蛟鱷余本水鄉土夙負滄洲諾一邱可棲遲
萬事甘零落

飲顧淄川榮夫

昔掌淄川篋今耽竹林賞解龜豈年及乘興非外獎偶會禽
尚心彌肆雲蘿想經始中園廬蘭橑蔭閑敞清波過庭激紫
蔓緣籬上薑芋抽薪萌菰蒲連宿莽差池喧鳥覆灑澗驚魚
響息陰聊舉爵臨涯時抱杖英英白雲游纏纏鮮飈蕩興遠
集蕭晨蘊眞愜吾黨蟬蛻迹已冥鸞翔意俱往方敦塵外交
言稅區中鞅

古意

主父朝上書夕召甘泉宮公孫棄東海歛起如旋蓬王猛三
秦豪賣畚洛城東馬周起徒步驥首虬鬚公達人貴憑化一
蛇而一龍碌碌不玉如落落非石同老氏得其眞善應入無
窮長嘯出鼎門高步躡華嵩儻遇王子喬攜手入雲中

天王寺竹林

雅志愛雲竹相看如故人玲瓏動風色瀟灑見天真枕簟開
新夏鶯花追晚春欲將疏懶性一問遠公鄰

晚過竹院

竹院迷青靄祇園橫翠微松門晚霞抱雪壁秋花飛湖迴習
池似臺荒吳苑非蒼蒼暝蘿合還趁漁樵歸

六月十日諸袁攜酒相過

堂上書生據槁梧一樽衰肺覺全蘇從知袁紹逃河朔更賞
王戎戀酒壚涸轍難忘頻煦沫此身無賴祇江湖不妨久坐
論肝腑紅燭淋漓清夜徂

湖夜

水月蒼蒼相蕩摩四天風起碎星河狂來直欲吞雲夢老去
甯辭著芰荷綠酒藏眞時嘯傲青山作伴夜行歌金輿玉座
千年事腸斷吳江東逝波

白龍洞

白龍卧巖洞霧雨長冥冥或化白衣老空山來聽經
春盡

榮華夢想今何在江湖飄零未有涯可惜少年留不得東風

二十五回花

古泉新霽對丹楓作


紙窗棐几竹間房一樹丹楓倚夕陽啜盡茶甌猶不去野人
偏自戀秋光

看杏花

宿雨初收麗晚霞江煙澹澹薄籠紗山家翠壁團春色野客
敲門看杏花

白雀返棹李王二子送余過虞山下作

芙蓉疊壁錯奇錦琉璃千頃搖青空把酒掀簾一長嘯眞堪
狂殺米南宮



明史紀事

貴陽陳田輯

丁籤

祝允明 五首

允明字希哲長洲人弘治壬子舉人除興甯知縣遷應天通判有祝氏集略三十卷又有金縷醉紅窺簾

暢哉擲果拂絃期期等集

國寶新編希哲超類絕人讀書過目成誦鉅細精粗咸賦腹笥有觸斯應無間俚鄙書學精工自急就以逮虞趙上下數千年變體罔不得其結構若羲獻真行懷素狂草尤臻妙筆本朝書品不知合置誰左壯語吳先賢讚允明生五歲能書過目即誦為詩時有藝苑厄言祝希哲詩如盲賈人張肆頗有珍玩位置總雜不堪楷法自元常二王永師祕監率更河南吳

興狂素顛旭北海眉山豫章襄陽靡不臨寫工絕晚
節變化出入不可端倪風骨爛漫天眞縱逸直足上
配吳興他所不論也
珊瑚網文徵明曰吾鄉前輩書家稱武功伯徐公次
爲太僕少卿李公楷法師歐顏而徐公草書出於
顛素枝山先生武功外孫太僕之瑁也早歲楷筆精
謹實師婦翁而草法奔放於外大父蓋兼二父之
美而自成一家者
容臺集枝指山入書如絲裏鍼如印印泥
王樹虛舟題跋平生見祝京兆書凡數十卷莫有
同者蓋書一到熟來無心於變自然觸手盡變也吾
嘗論有明一代書法祝京兆變化不拘董宗伯天才
超軼二公於三百年來足可籠罩
翁方綱復初齋集今日書家皆知祝書小楷勝其大
草然子見其行書合歐褚爲一手直追晉法不易幾
也王虛舟乃譏枝山骨韻未清殆僅見其蹟歟
田按枝指生言情之作頗有麗藻不盡合轍書法深
得古人神髓有口號云枝山老子鬢蒼浪萬事遺來
其攻苦矣

吳趨

閶闔紅樓起皋橋淥水迴綺羅搖日麗車馬逐雲來施旦非
吳豔機雲是晉才欲歌遺古調風俗轉堪哀

春陽曲

錢唐蘇小小京洛董嬌嬈穠芳競桃李清潤並瓊瑤頽山左
右倚因風上下飄東鄰不姓宋無恡一相邀

春遊虎邱

春光滿郊野吾獨愛西邱碧水一池定白雲千頃流散人歌
小海幼伎撥箜篌遠著謝公屐高登王粲樓人生一杯酒又
是一年遊

贈承公

牆外西林是寶坊林間高臥有支郎定回斜日雲穿衲吟斷

寒更月滿牀妙梵遠通潮隱隱清修分與柏蒼蒼何時爲取
無生話共了跌蒲一夜長

武帝傳

柞宮憑几畫成王淚落銅仙身似霜王母不來方朔死茂陵
松柏自斜陽

陸深 六首

深字子淵上海人弘治乙丑進士改庶吉士授編修
歷司業祭酒謫延平同知遷山西提學副使改浙江
歷江西參政四川布政使召拜光祿卿改太常兼侍
讀學士進詹事贈禮部侍郎諡文裕有儼山集一百

卷續集十卷

唐錦龍江集國初吾松多以書學名天下久已絕響
公近奮起遂凌躡前人而處其上識者謂趙文敏後
一人非諛詞也
藝苑卮言陸子淵詩如入賞官作文語雅步雖自有
餘未脫本來面目
詞林人物考子淵字學比於趙松雪每過同舍見鬆
几輒縱筆塗寫旁若無人品騭古今商確事理賞析
文義辨識書畫古品談鋒洒然一座盡傾
莫是龍石秀齋集陸文裕自言吾與吳興同師北海
海內人以吾爲取法於趙究論其風力實出吳興之
上
明詩選陳臥子曰子淵氣尚清拔學非深造
田接子淵論詩云近時李獻吉何仲默最工姑自其
近體論之似落人格套雖謂之擬作可也然其自作
乃平衍敷腴去李何尙遠書法在明人中不失爲第
二流

春山辭贈別何舍人仲默

登長坂望故都辭帝闈兮南驚渡河梁兮春波時一去兮難
再怨芳歲兮蹉跎赴山靈兮夙約返初服兮苾羅林深兮春

暮草靡兮雲和，援避席兮空谷。樹開障兮崇阿，左蘭兮右芷。牽芙蓉兮鬢蘿，聊倘佯兮寤歎。澹容與兮嘯歌，望佳人兮不可。卽眇千里兮傷如何。

徐州洪次韻

表裏山河勝，東泉復上流。斜陽明石佛，古堞遶徐州。谿影尤宜月，潮聲不待秋。去來風雨橫，奇絕冠茲遊。

劉蕡祠

諫議千年自有祠，唐朝宮闕黍離離。多情瘦馬衝寒到，無數青山落照遲。往事空傳臺下駿，靈風常滿廟中旗。冰霜入夜頻搔首，欲奠芳椒侑楚詞。

清明出行阡邱

病來廿日始勝冠，花柳清明滿畫闌。二月光陰半晴雨，百年塵世幾悲歡。王孫芳草連天碧，燕子東風作陣寒。萬事山頭一坏土，麒麟留得後人看。

素履齋

新裁紙帳木棉裘，曲几圍屏事事幽。明月射窗殘雪霽，夜深人在水晶樓。

王兵憲于澤以二力士送予遣還

紅袍白面好兒郎，燕趙豪華獨擅場。贈汝長纓三百尺，樓闌西去縛名王。

黃雲 五首

雲字應龍崑山人，以貢授瑞州訓導。有丹巖集十卷。

蘇州志黃雲文宗坡老書法山谷
 靜志居詩話丹巖詩雖未純然勝林屋十倍
 田按應龍與沈石田為素交有寄石田求畫詩云五
 日十日畫水石經旬亦可成一幅我求君畫故作難
 三四年過將五六人來莫怪數附書譬諸熊掌吾所
 欲擬乘艇子促迫之又恐收書到城隍題詩再拜致
 執事煩君開緘一寓日忽焉為我發新興湖上草堂
 風滿竹三茅二華人手筆靜傑之頂空洞腹經營意
 匠忽貌成爛逸天真洗凡俗厚子之嗜亦多矣豈止
 三月不知肉若合鳥有先生來只向江山寄遐矚語
 頗滑稽亦善鑿別收藏有宋思陵勅岳飛殺賊手詔
 為祛篋者攫去石田寄詩云思陵酒此翰破亦勅飛
 往矯害證逆檜滔天信欺罔此紙後不傳何以暴所
 枉錮子秘密藏何為世標榜天意流無方假盜理可
 想使之一人傳所見目為兩盜去轉相售售萬日
 賞存未為子欣失未為子恫慰子不平懷詩當發浩
 蕩

日夕

寂居山之阿木葉明返照陰厓凝晚色餘霞尚鮮耀遠心望

煙海孤興凌仙嶠歸牧驅牛馬溪船罷魚釣閉門羣動息默以領眾妙

雨中書事

病裏仍愁四十過學書學劍兩蹉跎白翻野飯炊粳稻綠染秋衣製芰荷遠道西風吹客鬢空江暮雨溼漁蓑村醪急辦青錢買兒女燈前且笑歌

題春草圖

野燒痕回一雨過村童放牧散平坡禰衡洲畔埋愁遠建業城邊積恨多誰見夜深嘶石馬但愁歲久沒銅駝江淹賦別魂銷處春水年年自綠波

題雲林畫二首

過雨山如罨畫明溪聲直到白雲亭雲遮不斷溪聲去流出
平蕪兩岸青

白髮雲林老畫師一生辛苦竟誰知何須更上峰頭望滿目
清秋滿目詩

蔡羽九首

羽字九遠吳人以太學生除南翰林孔目有林屋集

二十卷南館集十三卷

甫田集九遠詩晚更沈著時出奇麗
藝苑卮言蔡九遠詩如灌莽中薔薇汀際小鳥時復
娟然一覽而已
國雅九遠整秀

太湖備考陶周望云余曩年讀蔡羽洞庭記知有是
山又以茲山知羽後四年始至山中急欲就鄉人問
羽天王寺僧澄源者好事知文墨為余言山有東西
蔡村族最盛而羽怪誕有三間齋已處其中縛藁為

人合腰膝俱可屈曲朝課易夕課四書自為解而置
傳注几旁每開卷便大誦曰某甲謬甚叱童子牽藁
人來跪而杖之而置大鏡南面遇著書得意輒正衣
冠北面向鏡拜譽其影曰易洞先生爾言何妙吾今
拜先生矣羽尤以善易自負故稱易洞也
六硯齋筆記蔡林屋行押書道美有逸韻
田按羽妄自矜誇解經薄古人談詩文則卑韓杜如
周望所云抑何可笑竹垞謂羽集詩賦八百餘首文
二百餘首恆河之沙鉤金安在詆之亦過余為採掇
菁華亦是六朝人佳製

宴韓子承宗葑溪草堂與劉時服

中丞高館舊公子翠屏開曲水當門轉飛梁夾樹來花枝畫
吐豔水氣煖生苔樂意關啼鳥閒情付酒杯醉來白幘岸時
傍碧溪回夢得新能賦雲霞費翦裁

贈金子坤

別子蘭蛻花相逢竹生籜閒門風自開虛徑雲常鑰已煩揮

塵談未愜聽猿酌爲埽南山石秋眠看泉落

從新河至楓橋次李氏

垂虹一十餘滄洲次第歷波盪綺閣簾風送樓船笛萍迴開
明鏡渚緬淹去鷁出入山水間漸覺塵土滌寵少憂亦輕形
神獲雙寂

虎山橋

初出山腹中復見水行處透迤得平墟蒼茫急回顧山梁不
爲高延攬自成趣風條薄林翠珍木接葉香前葩未及瘁後
萼重競芳朝遊屢過煙霞石夜宿曾投松柏房從來不識銅
坑面今日青青落吾掌上崦何明媚下崦亦清朗楊花飛飛
青錦陂荇葉差差木蘭槳前帆乍滅後榜興長川引領雲憑

憑游絲亂起煖氣昏須臾不見西華村東風吹亂鷓鴣羣水
西顏色何紛紛繫馬芳祠忘夕曛

覆舟山臨望

覆舟山頭霽景明長松落落崖石平迴巒秀嶺低復昂傳聞
此地爲臺城南望建章宮佳氣何鬱葱秦淮樹中流遙與宮
門通城中萬井如碁畫楊柳煙中分紫陌內園蘭桂浮温香
戚里池臺蕩朱碧鳳凰樓閣無處尋臨春結綺作梵林樽前
卻是樂遊苑市朝更改成古今登臨易頭白銜杯落江日回
望北湖煙蟬鳴樹蕭瑟秋波慘淡荷芰花玉鳧錦雞踏浪霞
西曹已鳴馬東署復報衙冥冥湖底月寂寂城頭鴉停琴送
盡飛鴻影引領天邊不見家

送張西谷

茂先偏博物顧我意殊深客倦辭梁苑秋悲復楚吟空江明月棹高興碧雲岑別後魚賤早無令霜滿林

龍江驛曉發

朱門欲開猶未開煙花已簇鳳凰臺龍江棹歌天上去魚鳥春色鏡中來星流寶匣青霜劍柳拂長亭綠酒杯白狗赤雞何處去王孫原上起塵埃

吳門

錦帆寂寞鷺湖非山色含顰自落暉莫道千秋無勝事白鷗猶拂畫欄飛

陸包山述李三塘見推為題畫

披展雲山話雨中士龍人品李膺風荆州士論虛叨忝借筆題詩看洗桐

張靈一首

靈字夢晉吳人

丹青志張夢晉與唐寅氣志雅合又俱善畫夢晉人物冠服玄古形色清真無卑庸之氣山水筆生墨動斬然絕塵
姑蘇名賢小志夢晉能畫人物高遠有致然惟掩其醉得之莫可購取
山靜居畫論張夢晉風流蘊藉子畏流輩筆法妍雅亦娣姒間耳
存餘堂詩話夢晉吳中名士早歲功名未偶落魄不羈寄情詩酒間臨終之前三日作詩云一枚蟬蛻榻當中命也難辭付太空垂死尚思玄墓麓滿山寒雪一林松可以想見其風致

對酒

隱隱江城玉漏催，勸君須盡掌中杯。高樓明月笙歌夜，知是
人生第幾回。

靜志居詩話：夢晉狂生遊枝指生之門，其畫山水足
亞伯虎對酒一詩，可稱絕唱。

雷鯉 五首

鯉字惟化，自號半窗山人，建安人。

無聲詩：史半窗善畫山水人物，篆隸遒勁。
田按：半窗畫流傳甚少，詩特風致翩翩。

題畫 五首

竹外是誰家，茆屋桃花裏。問春春不知，閒行過流水。

鳥外風煙古，寺迴半帆倒。挂夕陽來，江天物色無人管。處處

野棠花自開。

竹杖芒鞋一徑深，山橋晴漲瀉松陰。隔江亭子是何處，紅葉

白雲秋滿林。

朔雪江天草樹寒，小齋日日倚清酣。牀頭酒盡無人到，吟對

梅花只自看。

滄江碧浪飛紅葉，峭壁孤峰倚斷雲。一舸圖書兩詩客，海天

秋思屬平分。

史忠 一首

忠字端本，一字廷直，號癡翁，上元人。

金陵瑣事：史癡山水人物，自寫胸中逸氣，不可以畫
之常格求之。

畫史：會要癡道人善畫，似方方壺，長於雲山圖，瀟灑
不羣。

田按：癡翁築臥癡樓，近冶城，引客談笑呼盧，其中酒
酣，搦管為新聲樂府，略不構思，或五六十曲，或百曲，
同時陳大聲、徐子仁皆自以為弗如。畫山水樹石，縱
筆揮寫，嘗訪沈石田於吳門，沈他出堂有素絹，潑墨

成山水巨幅不通名姓而去石田曰必金陵史癡也
要之歸留三月而別石田至金陵亦館臥癡樓為作
像贊曰玩世滑稽風顛月癡灑筆淋漓水走山飛癡
喜曰石田翁為我寫真也有妾何氏名玉仙號白雲
道人能篆書小畫解音律癡求兩京絕手琵琶張祿
授以南北曲自度新詞被之有詩紀事云忽雷會說
鄭中丞不似女郎樓上聽此日白雲推卻處癡翁清
賞倚雲屏女笄當嫁婿家貧不能具禮詭辭攜女觀
燈與其婦送之婿家大噪而去與赤松山農金琮為
素交盛時泰合編二人詩題曰金陵二隱稿未授梓
燬於火啟禎間翁裔孫志英更輯癡翁遺集今亦不
可得也

題畫

雨晴江館洞雲歸桑落人家半掩扉好是痴翁真不俗揮毫

便作米元暉

陳鐸一首

鐸字大聲下邳人睢甯伯文之曾孫世襲指揮家南

京有秋碧軒雪香亭稿

野獲編今傳誦南曲如東風轉歲華云是元人高則
誠不知乃陳大聲與徐髯仙聯句也今人但知陳大
聲南調之工耳其北一枝花天空碧水澄全套與馬
致遠百歲光陰皆咏秋景真堪伯仲又題情新水令
碧桃花外一聲鐘全套亦絳麗不減元人本朝詞手
似無勝之者
帝里明代人文略黃錦衣琳字美之家有富文堂一
歲元宵大集聲樂九峰徐君秋碧陳君稱上客美之
曰今日佳會舊詞非所用也請二公聯句即命工度
諸絃索何如三公揮翰甫畢一調即命工者肄之既
合成而奏之一時交傳以為元宵勝事
金陵遺事陳梅揮大聲齋居云晚樹低分霽春雲淡
隔城夜往新豐鄉云山月巧窺人影瘦夜深先向客
衣生
無聲詩史陳大聲山水仿沈啟南繪一幀送史廷臣
自題絕句云情深此日難為別相送元方又季方萬
里楚江孤棹迴穩吟秋色到維揚

次與仲和聯句韻

臥病經年喜遇君草堂清話到斜曛濁醪拚取樽前醉險韻
何妨席上分冷雨小蛩鳴切切輕風殘葉下紛紛也知別後
還相憶何處鐘聲隔暮雲

徐霖 一首

霖字子仁吳人徙南京補諸生坐事削籍武宗南狩
召見欲官之固辭賜飛魚服扈從還京後歸里有麗

藻堂稿

金陵瑣事徐霖少年數遊狹斜所填南北詞大有才
情語語入律吳中文徵仲題畫寄有句云樂府新傳
桃葉渡彩毫遍寫薛濤箋迺實錄也武宗南狩伶人
臧賢薦之於上召命禁直霖作詩紀之云封禪無書
何獻納清平有調幸遭逢及放歸作詩云放歸吾願
遂計日便還鄉免上乞骸疏將求辟穀方無心判恩
怨有道管行藏耿耿思君念他生亦不忘
帝里明代人物略九峰徐子仁豪爽迭宕開快園武

定橋東中有翠篠清澗芳林幽砌臺曰振衣刻名公
題詠下有麗藻堂喬伯岩書晚靜閣文衡山書風流
曠達一時豪貴悉禮下之武宗南狩幸其晚靜閣釣
魚得金鯉又失足落池中今園有宸章堂浴龍池紀
其實也

藝苑卮言徐霖好堆墨書神采爛然
名山藏子仁象登神品真行皆入精妙碑板書師顏
柳題榜大書師詹孟舉並絕海內武宗兩幸其宅子
仁故長髯武宗手剪之以為拂子因自號髯翁
畫史會要徐髯仙雖不以丹青名所畫松竹花草蕉
石皆精雅可愛
無聲詩史子仁工詞翰旁及篆書并山水花卉無不
臻妙

昭慶寺

寺內尋幽勝躋攀輿轉豪空廊廡壁暗古殿戒壇高禪味誰
真悟形骸自作勞無文來發願雙鬢愧刁騷

桐城歸舟漫興

老翁七十未偷閒，浩淼江城去復還。覽鏡愧難留黑髮，當杯狂欲醉青山。仰窺鵬鷲雲霄上，近狎鳧鷖洲渚間。誰謂衰年全省事，獨於詩興不曾慳。

郭詡 一首

詡字仁宏，泰和人。

名山藏郭詡自號清狂，少從事學官，弟子業去而極其能於畫，遍歷名山曰：豈必譜也？畫在是矣。同時江夏吳偉、北海杜堇、姑蘇沈周俱以畫名，莫不延頸願交。天下競傳清狂畫，購之百金。畫史會要：清狂道人，身意手摹，即成山水畫。已題詩其上，間作辟穀抱膝等圖。題云：仰看青天小，於落茫茫萬古如一日。世間無處可逃名，走入龍宮學吹笛。

題畫

流落人間四十年，并無人識是神仙。天涯地角無多地，只借

洪厓一夜眠。

景卿 一首

卿字夢弼，南京人。

金陵瑣事：景卿善小景花草。

題自寫杏花

晴園紅粉護春煙，彷彿江村二月天。記得踏青回首處，一枝斜拂酒樓前。

高澱 一首

澱字宗呂，侯官人。有石門集六卷。

閩畫記：高澱工山水花卉，人物翎毛，用墨濃潤，運筆古雅。出入宋元四大家，各造其妙。微賸八編，侯官高澱號霞居子，善隸草，八分詩畫皆逸品。登岳陽樓云：殘雨數峰衡嶽曉，暮雲孤樹洞庭

秋亦有畫意

羅山月下遣興

石門道人真好奇角巾野服駭羣兒慣隨白鳥行偏健貪看
青山坐不辭世短每憐長伏枕家貧猶自苦吟詩杖藜來往
羅山月此意惟應野老知

明詩紀事

貴陽陳田輯

丁籤

王守仁 十七首

守仁字伯安餘姚人弘治己未進士授刑部主事改
兵部以忤劉瑾杖闕下謫貴州龍場驛丞起南刑部
主事改吏部歷員外郎中遷南太僕少卿進鴻臚卿
拜左僉都御史巡撫南贛進右副都御史論平宸濠
功擢南兵部尚書封新建伯贈侯諡文成從祀孔子
廟庭有陽明全書三十八卷

四庫總目守仁勲業氣節卓然為文博大昌明詩亦秀
逸有致

升菴集慎嘗反復晉書目王導為叛臣頗為世所駭
異後見崔後渠松窗雜錄亦同余近讀陽明紀夢詩
尤為卓識其自序曰正德庚辰八月二十八日臥小
閣忽夢晉忠臣郭景純以詩示余且極言王導之奸
謂世之人徒知王敦之逆而不知王導實陰主之覺
而為詩以紀其略詩云秋夜臥小閣夢遊滄海濱海
上神仙不可到金銀宮闕尚嶙峋中有仙人芙蓉巾
顧我宛若平生親欣然就語下烟霧自言姓名郭景
純攜不歷歷訴衷曲義憤感激難具陳切齒尤深怨
王導深奸老猶長欺人當年王敦觀神器導實陰主
相緣黃不然而三問三不答胡忍使敦殺伯仁寄書欲
拔太真舌不相為謀敢爾云敦病已篤事已去臨哭
嫁禍復賣敦事成同享帝王貴事敗仍為顧命臣幾
微隱約亦可見世史掩覆多失真
藝苑厄言王新建詩如長爪梵志彼法中錚錚動人
王世貞讀書後伯安之為詩少年時亦求所謂工者
而為才所使不能深造而衷於法晚節盡舉而歸之
道而尚為少年意所謂累不能渾融而出於自然其自
負若兩得而幾所謂兩墮者也以世眼觀之公甫固
不如以法眼觀之伯安瞠乎後矣
錢德洪陽明年譜先生謫龍場驛丞至錢塘劉瑾遣
人隨偵先生度不免乃託言投江以脫之因附商船

遊舟山遇颶風一日夜至閩界登岸至一寺寺有異
人嘗識於鐵柱宮約二十年相見海上至是出詩有
二十年來消息我先聞之句與論出處
且將遠遁其人曰汝有親在萬一瑾怒逮爾父誣以
北走胡南走越何以應之因為蒼得明夷遂決策返
先生題詩壁間曰險夷原不滯胸中何異浮雲過太
空夜靜海濤三萬里月明飛錫下天風因取問道出
武夷返錢塘赴龍場驛
西湖遊覽志守仁之既擒宸濠也忽傳王師已及徐
淮遂乘夜過發至錢塘凜凜憂慄作詩云靈鷲高峰
暑氣清竺天石壁雨痕晴客來湖上逢雲起僧住峰
頭詰月明世路久知難直道此身那得尚浮名移家
早定孤山計種果誅茅卻易成頃之王師遣人追宸
濠復還江西遂謝病居淨慈寺
鄭露赤雅文成謁伏波廟詩樓船金鼓宿烏蠻魚麗
羣舟夜上灘月繞旌旗干嶂靜風傳鈴鐸九溪寒象
夷未必先聲振神武由來不殺難相見虞廷新氣象
兩階干羽在雲端少時夢中有詩云卷甲歸來馬伏
波早年兵法鬢毛髭雲迷銅柱雷轟折六字題詩尚
不磨文成身後謗與削爵與薏苡之事略同
列朝詩集先生在郎署與李空同諸人遊刻意為詞
章居夷以後講道有得遂不復措意工拙然其俊爽

之氣往往涌出於行墨之間
明詩選李舒章曰文成才情振拔少年頗擅風雅自
講學後多作學究語乃不堪多錄
田按文成謫吾黔龍場驛丞時提學副使席書修葺
會城書院率諸生以師禮事之是時風氣未開文成
舉知行合一之教紛紛異同罔知所入厥後文成弟
子道林蔣信以副使提學貴州重舉陽明學旨以教
諸生貴陽心菴馬廷錫獨有悟入清平淮海孫應鰲
見知於提學徐樹錫即傳陽明心齋之學又走桃岡印
證於道林思南同野李渭自傳家學亦謁道林陳樓
上樓下光景終明之世吾黔學祖斷以文成爲開先
矣文成居龍場有龍岡書院寅賓堂何陋軒君子亭
玩易窩陽明小洞天居會城有文明書院居夷集中
有諸生來詩云門生隨羣集樽斝亦時展講習性所
樂記問復懷覲諸生夜坐詩云講習有真樂談笑無
俗流諸生詩云嗟我二三子吾道有真趣胡不攜書
來茆堂好同住夜宿汪氏園詩云他年貴竹傳遺事
應說陽明舊草堂今祀先生於會城之貴山書院城
外之芙蓉山藏度遺像焉斯不祧之俎豆矣

山中立秋日偶書

風吹蟬聲亂林臥驚新秋山池靜澄碧暑氣亦已收青峰出
白雲突兀成瓊樓袒裼坐溪石對之心悠悠倏忽無定態變
化不可求浩然發長嘯忽起雙白鷗

登泰山

窮厓不可極飛步凌煙虹危泉瀉石道空影垂雲松干峰互
攢簇掩映青芙蓉高臺倚巉削傾側臨崆峒失足墮烟霧碎
骨顛崖中下愚竟難曉摧折紛相從吾方坐日觀披雲嘯天
風赤水問軒后蒼梧叫重瞳隱隱落天語闐闐開玲瓏去去
勿復道濁世將焉窮

答汪抑之二首

北風春尚號浮雲正南馳風雲一相失各在天一涯客子懷

往路起視明星稀驅車赴長阪迢迢入嵐霏旅宿蒼山底霧
雨昏朝彌閒關不足道嗟此白日微切磋懷良友願言毋心
違

聞子賦茆屋來歸在何年索居間楚越連峰鬱參天緬懷巖
中隱磴道窮扳緣江雲動蒼壁山月流澄川朝採石上芝暮
漱松間泉鵝湖有前約鹿洞多遺編寄子春鴻書待我秋江
船

龍岡新構有序

諸夷以予穴居頗陰溼請構小廬欣然趨事不月而
成諸生聞之亦皆來集請名龍岡書院其軒曰何陋
謫居聊假息荒穢亦須治鑿巖薙林條小構自成趣開窗入

遠峰架扉出深樹墟寨俯透池竹木互蒙翳畦蔬稍漑鋤花
藥頗雜蒔宴適豈專予來者得同憩輪奐非致美毋令易傾
敝

無寐

窮厓多雜樹上與青冥連穿雲下飛瀑誰能識其源但聞清
猿嘯時見皓鶴翻中有避世士冥寂棲其巔繫子亦同調路
絕難攀緣

秋夜

樹暝栖翼喧螢飛夜堂靜遙穹出晴月低檐入峰影窅然坐
幽獨恍爾抱深警年徂道無聞心違迹未屏蕭瑟中林秋雲
凝松桂冷山泉豈無適離人懷故境安得駕雲鴻高飛越南

景

香山次韻

尋山到山寺得意卻忘山巖樹坐來靜壁蘿春自閒樓臺星
斗上鐘磬翠微間頓息塵寰念清溪踏月還

尋春

十里湖光放小舟謾尋春事及西疇江鷗意到忽飛去野老
情深只自留日暮草香含雨氣九峰晴色散溪流吾儕是處
皆行樂何必蘭亭說舊遊

化城寺

雲端鼓角落星斗松頂袈裟散雨花一百六峰開碧漢八十
四梯踏紫霞山空仙骨葬金榔春煖石芝抽玉芽獨揮談塵

拂烟霧一笑天地真無涯

歲暮

兀坐經旬成木石忽驚歲暮還思鄉高檐白日不到地深夜
黠鼠時登牀峰頭霽雪明草閣瀑下古松閒石房溪鶴洞猿
爾無恙春江歸棹吾相將

移居勝果寺

江上但知山色好峰迴始見寺門開半空虛閣有雲住六月
深松無暑來病肺正思移枕簟洗心兼得遠塵埃富春咫尺
煙濤外時倚層霞望釣臺

羅舊驛

客行日日萬峰頭山水南來亦勝遊市谷鳥啼村雨暗刺桐

丁籟卷十三
五
花暝石溪幽蠻煙喜過青楊瘴鄉思愁經芳杜洲身在夜郎
家萬里五雲天北是神州

過天生橋

水光如練落長松雲際天橋隱白虹遼鶴不來華表爛仙人
一去石橋空徒聞鵲駕橫秋夕謾說秦鞭到海東移放長江
還濟險可憐虛卻萬山中

陸廣曉發

初日瞳瞳似曉霞雨痕新霽渡頭沙溪深幾曲雲藏峽樹老
千年雪作花白鳥去邊回驛路青崖缺處見人家遍行奇勝
才經此江上無勞羨九華

南菴次韻

隔水樵漁亦幾家緣岡石路入溪斜松林晚映千峰雨楓葉
秋連萬樹霞漸覺形骸逃物外未妨遊樂在天涯頻來不用
勞僧榻已僭汀鷗一席沙

山中示諸生

桃源在何許西峰最深處不用問漁人沿溪踏花去

何塘一首

塘字粹夫懷慶衛人弘治壬戌進士改庶吉士授編
修歷修撰謫開州同知改東昌遷山西提學副使改
松江歷南太常少卿擢工部侍郎改戶部禮部進南
右都御史贈工部尚書諡文定有柏齋集十一卷

四庫總目塘論學一以格致爲宗集中送湛若水序謂
甘泉以存心爲主予以格物致知爲先非存心固無

以爲格致之本物格知致則心之體用益備其生平
得力在此故當時東南學者多宗王守仁良知之說
而塘獨以躬行爲本不以講學自名然論其篤實乃
在講學諸家上

懷陸子淵

共誰虛室細談玄東望江雲意渺然憶昔華年今白首不堪
吟對菊花天

湛若水

三首

若水字元明增城人弘治乙丑進士改庶吉士授編
修歷侍讀南祭酒擢禮部侍郎進尙書改兵部謚文

莊有甘泉集三十二卷

田按甘泉詩莫名其體似道家演訣而非訣似禪家
說偈而非偈蓋參合宋擊壤明定山諸派而成者也
若北風吹湖船帆挂南嶽樹桃李默不言流鶯語春
風羨彼名勝在不欠杜陵詩夜甕分江水春茶煮楚

雲何嘗不清脆但集中不可多得耳

雨中坐樓上書所見

濁酒不得意新詩空自酬冥冥翳白日鬱鬱坐窮愁飛鳥衝
風墮歸雲被雨留小舟還數點寂寞在荒洲

遊羅浮

聞歌一夜動幽懷直踏飛雲萬丈崖翠靄浮雲白日暝虹橋
有路青天來三月二月春過半千山萬山花正開笑問仙源
杳何許雲濤浩浩不堪裁

水簾洞

千秋雲谷還歸我三二求羊作近鄰莫種桃花臨水岸引人
來問武陵津

崔銑一首

銑字子鍾安陽人弘治乙丑進士選庶吉士授編修

以忤劉瑾改南吏部主事瑾誅復故官歷侍讀進南

祭酒以劾張璉桂萼失帝旨令致仕用薦起少詹事

兼侍讀學士擢南禮部侍郎贈禮部尚書諡文敏有

洄詞十二卷

四庫總目銑力排王守仁之學謂其不當舍良能而談
良知故持論行己一歸篤實其爭大禮劾張璉桂萼
風節表表亦不愧其言所作政議十篇準今酌古無
儒生迂闊之習他若漫記十條可以補宋史之未備
論傳兩則可以靖明代之浮言而岳飛論一篇稱飛
之急宜奉詔尤識大體蓋不以文章著而文章自可
傳也第十一卷中有嚴嵩鈐山堂集序似涉南園作
記之疑然嵩集載此序題嘉靖己亥據明史嵩傳是
時方為禮部尚書未操國柄尚無由預識其姦是猶
司馬光之於王安石非陸游之於韓侂胄矣

田按文敏講學尊朱抑陸與陽明宗旨不合其論明
以得而稱數方天既專且久詩法唐必周孔大哉志乎
東里入閣司文既專且久詩法唐必周孔大哉志乎
之弘治中南城羅思且久詩法唐必周孔大哉志乎
句老宿儒見而驚服其時北郡李夢陽申陽何景明
元表師法曰漢無騷唐無賦宋無詩二子抗節退舉
協能成章李之雄厚何之逸爽學者尊如李杜焉惟
於西涯會不齒及豈非不滿其相業乎其序羅景鳴
集云往西涯公處劉瑾張永之際不可言臣節矣士
惠其私猶曲貸而與之幾亡是非之心而弇州藝苑
厄言乃侈談火城行觴之遇何哉


贈謝茂秦

三月清洄上翩翩兩度來搗詞傾玉海弔古賦銅臺歧路楊

朱淚江湖李白杯令公今謝事回首尚憐才

四溟詩話崔後渠贈子詩楊朱李白自然的對戎昱
詩曰衛青師自老魏絳賞何功較之後渠精確不及

宋為正陽李自林命公今爾事河首領其本
三日歸國上徽服



明詩紀事

貴陽陳田輯

丁籤

石存禮 四首

存禮字敬夫益都人弘治庚戌進士官紹興知府

四庫總目海岱會集十二卷明石存禮藍田馮裕劉澄

甫陳經黃卿劉淵甫楊應奎八人唱和之詩也嘉靖

乙未丙申間經以禮部侍郎丁憂里居田除名閒住

淵甫未仕存禮等五人並致仕乃結詩社於北郭禪

林後編輯所作成帙冠以社約八人皆不以詩名而

其詩皆清雅可觀無三楊臺閣之習亦無七子摹擬

之弊觀其社約中不許將會內詩詞傳播違者有

罰一條蓋山間林下自適性情不復以文壇名譽為

事故不隨風氣為轉移而八人皆閒散之身自吟詠

外別無餘事故互相推蔽自少疵類其斐然可誦良

亦有由矣古夫于亭雜錄吾鄉六郡青州冠蓋最盛世宗時林

下諸老為海岱詩社倡和尤盛其人則馮闕山黃海亭石來山劉山泉范泉楊灑谷陳東渚而卽墨藍北山亦以僑居與焉倡和詩凡十二卷無刊本余近訪得鈔本詩各體皆入格非浪作者闕山卽四馮之父文敏琦之曾祖山泉范泉則文和珩之孫也

因接敬夫五言古詩有柴桑遺韻

幽居

幽居近城府而無城府迹耕鑿樂歲時樵牧共朝夕鳥啼芳樹深犬吠村巷僻乘閒或杖屨有酒邀鄰客埽石安尊尊葺藉草爲茵席陶然忘外求所願從所適

石門

杖屨從所適愛此石門行川原斂飛雨佳木當春榮興言磐石間坐看雲氣生徘徊日將夕山水有餘清

夏日山中訪隱士

治世有隱淪幽居出塵境逍遙物外心駘蕩山中景時豐官稅輸野曠人迹屏雨晴農事餘禾苗綠幾頃曉來門尙關鳥啼夢初醒客至啟南軒坐消白晝永遺編共討論微言發深省高林暑氣無清風襲衣冷盤桓興未闌夕陽下西嶺

秋意

草蟲階下鳴聽久猶未歇掩卷坐沈寥秋聲振林樾人生無幾何爲樂不可輟風吹浮雲開送我半窗月逍遙步前庭孤螢自明滅

劉澄甫

一首

澄甫字子靜壽光大學士珩孫正德戊辰進士官山西參議有山泉集

漁洋詩話花林曠在雲門山南益都山水佳處也山泉翁詩云山藏柳市無車馬水隔桃源有子孫馮宗伯北海鍾司空龍淵皆屬和

君馬黃

君馬黃臣馬白君馬日立赤墀中臣馬當行雪山積玉勒嘶
秋風凋弓抱明月十二閑中雲錦花三千里外胡風沙香閨
紅顏泣成血邊城白骨多如麻交河北流無青草年年走馬
交河道

西洲曲

采蓮南渡頭采菱西洲口日落不逢人秋雲重回首

劉淵甫

一首

淵甫字子宏澄甫弟正德庚午舉人官漢陽知府有

海岱稿

半山亭

名亭積翠通幽徑峭壁陰崖掩夕暉夜雨似疑山鬼聽晝閒
惟見海鷗飛門當澗壑挂寒瀑棟宿雲霞落草衣一賦薜蘿
招隱去逍遙塵外澹忘歸

馮裕

一首

裕字伯順臨朐人正德戊辰進士累官雲南按察副
使有集

冬月過范泉精舍

面面青山一畝宮菊籬莎逕細泉通土階剩見藤蘿月石檻
徐來松竹風盡日讀書應自領閉門覓句許誰工黃柑紫蟹

葡萄酒常對清狂鶴髮翁

黃卿四首

卿字時庸益都人正德戊辰進士累官江西布政使

有編茗集

田按編茗詩特矜練在海岱山會集中別自一格所著編茗詩話惜今不見

洛陽道

山川開鞏洛九日會中州芳樹夾馳道奇花簇酒樓衣冠盛
祖餞綺繡相追遊蘇秦佩印日車馬去如流

聞蔣侍御將至

松寺衣冠會高軒豸繡遲碧雲斜日合芳草入春滋馬飲淄
澠曲旌留管晏祠雷琴先拂拭倩客繫朱絲

遊寶峰寺

蘭若登遊開積翠諸崖環拱鬱嵯峨殿雲依樹鶴秋唳塔日
穿林麝午過異代金容雄上黨中天花雨灑漳河憑師欲發
珠林祕北獻蓬萊意如何

三關書事

限夷巖赴黃花嶺石壁重關雁度愁直北蕭蕭纜百里黑山
枯草盡邊頭

楊應奎一首

應奎字文煥益都人正德辛未進士官南陽知府有

澠谷集

團扇郎

秋風歇團扇郎心中道變慙懃度歲寒夏至還相見

陳經一首

經字伯常益都人正德甲戌進士累官兵部尚書加

太子少保

山行過僧菴不大

蘿逕盤青靄松門隱碧岑野雲看不極禪榻倦重尋樹斷浮
幢影巖虛落磬音何須支遁語已覺淨塵心

朱朴 十二首

朴字元素海鹽布衣有西村集三卷

四庫總目朴近體格調清越閉戶苦吟人品已高其詩

品茗茗物表

樵李詩繫元素性耽詩自少至老未嘗一日廢兼善
繪事興到輒作雲林小幅其詩孤清警拔頗具排古

蕩今之致一時林下諸賢並邀入社與錢東畚徐豐

厓吳南溪陳勾溪徐東濱陳古厓劉海邨鍾西泉釋

石林為瀛洲十老之會推元素為首後更得董羅石

許雲邨沈紫硤鍾彥村及僧秋江雪江選辰命篇且

命畫士繪圖以傳焉

田藝蘅海鹽文獻志西村善繪繪成作蠅頭楷題詩

其上

居易錄海鹽朱朴西村詩雖未脫臨摹之迹亦有佳

句七言如數峰蒼翠寺門迴三月落花溪水深棟花

風過蠶蛾老麥秀城深雉子斑千年玉骨湘纍墓萬

里堅城少保家雁來關塞暮天碧龍起江湖秋水腥

巫峽曉風鬢短髻楚江秋水練長裙山圍野色迷秦

駐海送潮頭上浙江落花時節已寒食流水陂塘還

祓除白雲出岫澹如掃紅藕作花香可憐月明蒼壁

繫仙舫風細幔亭流白雲此例皆佳

田按嘉靖壬寅徐東濱結小瀛洲社會西村以海濱
一老清吟雅製領神騷壇仿西園故事倩畫士陳詢
繪圖於立相語者為西邨豐厓西泉聚首閱卷者為
東畚南溪勾溪挾童過橋者為海邨欲行且顧者為
古厓坐以待奕者為東濱石林東濱序所謂衣冠萃
止獻酬乃行四美具而二難并三壽朋而五福介仕
無愧於軒裳隱有光於邱壑洵一時勝事也

蘿石山人惠松花餅

山風吹林時雨歇雲邊埽落黃金屑并刀割蜜香在手和作
銅盆百規月老夫肺病方作殃一片入口心胸涼舌根猶含
魂絲冷腸腑已透龍髯香蘿翁蘿翁最知我白紙奚囊封一
裏金莖沆漑常恐誑玉碗醅酥聊許可山中老松三百株崖
蜂醞液流醍醐春來更製數十斛乞與一斗知能無

謝王兩舟惠靈壽杖

武當山高幾萬丈中有千年靈壽杖金光玉芝秀所鍾生在
青霞石崑上兩舟先生道者流贈我一枝東海頭琅玕潤滑
鐵堅瘦昂首屈項蒼精虬老夫病足如跛鼈藉此扶持少顛
蹶朝出橫拖石壁雲暮歸倒拄溪橋月乘舟著篙馬著鞭凌

高步下無不便爲尋短句謝遠意逶迤啄碎青苔錢不愁化
龍忽飛去不願提攜朝玉陛但使長挑沽酒錢日日登堂共
君醉

葦邨爲常州吳通府題

長州吳別駕家在葦花莊好雨煙叢綠涼風露葉黃遠邨通
角里流水入吳鄉手種沙邊樹他年繫釣航

石屋洞隆公房

我愛巖居宿因過衲子家山蔬和葛粉野飯間胡麻水帶煙
霞味茶收穀雨芽不知春早晚開到木蘭花

上巳同友出郊

二月三日出郭行風和日暄天氣晴脚泥補巢舊家燕隔水

喚春何處鶯壚頭小姬酒正熟道傍古墳人自耕勸君行樂
貴及早明日清明花滿城

懷句溪

苦憶句溪溪上翁暮年多病少過逢盤飧不乏憐牙健世事
無聞愛耳聾誰共青燈分半榻白梳白髮對孤峰滄洲寂寞
鷗鳧散目送征鴻意萬重

扶杖

扶杖東皋望遠山物華消息與情關棟花風過蠶蛾老麥秀
城深雉子斑誰氏墓田荆棘裏斬新亭館畫圖間道傍惟有
寒松樹吹盡春風只舊顏

楚江秋曉

練淨澄江露未稀苦吟猶憶謝玄暉六朝往事青山在三楚
空城白鷺飛霜落水邨菰米熟石高沙岸柳條稀重華一去
無消息目極蒼梧淚滿衣

茶谷山房

池臺六月興堪乘六曲闌干取次憑簾外午陰綠澗竹水中
人影過橋僧催詩硯滴銀牀露醒酒瓜嘗玉椀冰白社故人
閒散地不妨來往喜相仍

東濱席詠芍藥

憶昨臨軒把酒看過年花發又憑闌紅芳有約春筵在白髮
無情曉鏡寒雲擁畫屏籠繡幄露涵香氣滴銅盤舊家池館
棠陰下未許風光讓牡丹

歌風臺

酒闌歌徹大風詞不是鴻門舞劍時
萬里中原皆漢土高皇猶有故鄉思

碧雲寺

塢影蕭蕭夕照間碧雲黃葉滿秋山
空堂夜冷無燈火惟有貧僧乞米還

陳鑑四首

鑑字用明海鹽布衣有句溪集

樵李詩繫句溪詩鮮芳幽禱
田按西村句溪野趣逸情風味略近

雨中喜西村諸君見過

深酌看清雨田家無好春
年光餘逕草風味只溪蘋
此日有

限日幾人無事人醉眠君未去
交誼向吾真

訪石林

海雨溼山木野泉通竹籬
偶隨流水去恰值道人期
坐久日移午來稀
花笑遲小園春事歇
滿舉送春卮

句溪暮歸

淨漱滄浪坐晚涼浩歌篷底又斜陽
貧能到骨心方逸嬾得成癡事
盡忘夢裏風煙詩帙亂手中湖海釣絲長
東風吹入句溪棹碧草清波十里香

讀靖康史

日短中原雁影分空將鑲子寄曹勛
黃龍塞上悲笳月祇隔臨安一片雲

錢琦 一首

琦字公良海鹽人正德戊辰進士授盱眙知縣歷南
刑部郎中出為臨江知府改思南有東畚集十四卷

遺懷

手種篔簹傍水邊露華抽碧動江煙主人空有他鄉夢辜負
青青玉可憐

吳昂 一首

昂字德翼海鹽人弘治乙丑進士授宣城知縣改新
建歷兵部刑部郎出為福建按察僉事終布政使有

南溪集

元日

晴窗罷檢白雲篇自爇名香起篆煙晚興偶移溪上屐凍梅

含雪報新年

徐泰 一首

泰字子元海鹽人弘治甲子舉人授桐城教諭改蓬
州學正遷光澤知縣有玉池臺

田按徐子元詩談評騰洪承以來詩人頗稱真賞所
輯明風雅四十卷搜採極博楊升菴譏其浮濫未為
定評也

秋夜澈湖望月

澈湖湖上桂花秋海月當年滿畫樓彷彿錢塘六橋夜至今
人說小杭州

徐咸 一首

咸字子正泰弟正德辛未進士授沔陽知州遷襄陽知府有東濱三稿

和石門懷陳句溪沈紫硤

紫硤逃名士句溪遁世翁兩峰盤谷景一曲鑑湖風雪映吟髭白梅薰酒面紅何時過蕭寺共聽五更鐘

西村畫

平蕪漠漠遠山青楊柳風多水氣腥好似衡陽舊遊處蒸湘斜抱合江亭

鍾梁一首

梁字彥材海鹽人正德甲戌進士授刑部主事歷員外郎中諫南巡杖闕下尋出知濟南府改南昌有西

皋集


暮春

楊柳依依杜若香陂塘水煖浴鴛鴦多情惟有春來燕又逐東風入草堂

陳瀛一首

瀛字古厓海鹽人國子生授宛平主簿遷龍巖知縣雪夜過妙光寺

朔雲卷水氣憑陵此夕山陰興已乘高笠短蓑還出浦滿湖風雪夜尋僧



明詩紀事

貴陽陳田輯

丁籤

史鑑 十二首

鑑字明古吳江人有西村集八卷

四庫總目史鑑詩落落無俗韻

匏翁家藏集明古於書無所不讀而尤熟於史論千載事歷歷如見有劉道原之精時事人言得於聞見筆之成編有洪容齋之博為文紀事有法詩不屑為近體冥搜苦索欲追魏晉而及之家居水竹幽茂亭館相通客至陳三代秦漢器物及唐宋以來書畫名品相與鑒賞好著古衣冠曳履揮塵望之者以為列仙之傳也

靜志居詩話西村才名亞於石田然以詩論刻意學古似當勝沈一籌田按西村集五字詩為勝七言斷句亦有風韻

鍾希哲者台州人也妙於傳神賦詩紀之

人生無百年五十又過一去者日以多來者日以偏情慾與
寒暑晝夜相剽賊徒行已須杖短髮不任櫛顧茲孱弱軀那
爲久存物一朝隨化盡形容不復識鍾生妙傳寫爲我聊把
筆傳染借丹青經營自胸臆精神與形似毫髮無所失端如
鏡中影恍若水底石大均斯賦形其理固莫測孰知毫采功
妙奪造化力我聞先正言自治不外飾求真旣爲妄望久甯
非惑君看古人像存者無百十惟能慎厥修庶幾爲永則

重陽庵

我遊重陽庵不見重陽子丹成飄然與世辭騎虎遨遊太清
裏三山等鰲簪四海猶杯水萬里一瞬間千年片時耳後人

作屋青山頭重陽不來人自遊長風蕭蕭日杲杲醉卧白石
臨清流青衣洞深且幽銜花野鹿鳴呦呦仰招白雲喚白鷗
吾將與爾仍丹邱

憇奉慈庵

松頭孤鶴下石罅亂泉鳴入隴疑無路逢山屢問名客行忘
遠近僧老廢將迎一笑出門去五湖風浪生

飲烏步顧氏村居

去郭逾千步清風自一鄉日斜魚市集歲久水祠荒草色遙
連浦花枝半出牆西南山更好欲渡苦無梁

孤山

一上孤山望春陂帶夕曛西來千嶂合南下兩湖分路遶前

朝寺雲埋處士墳畫船歸去晚歌吹月中聞

經上海縣

岸崩橋易圯水濶渡難招浦淑遙通海舟航半趁潮市聲先
旦集野樹未霜凋明月如相識依依伴寂寥

冬夜逢臨川聶雲章話舊

頻年違晤語此日賁林垞鬢髮綠愁白家山入夢青功名成
潦倒書劍尚飄零明發松陵道離歌惜共聽

聚遠樓

新起高樓九溪上無邊風景在虛櫺太湖一水際天綠洞庭
兩山終日青帆帶夕陽來冉冉雁拖秋影入冥冥何人卷幔
吹簫坐明月滿空涼露零

題小景送人歸宜興

朝下銅官去暮向銅官歸春風被花惱滿山蝴蝶飛

蘇隄對酒次沈啟南韻

雨後滿湖生翠茗畫船歸去水迢迢生憎蘇小墳前草野火
曾經幾度燒

何克廉宅觀妓

一曲清歌遠畫梁春風吹散舞衣香酒酣卻笑蘇州守何事
樽前欲斷腸

震澤竹枝辭

震澤雨晴添水波郎船將發唱吳歌誰知三萬六千頃不及
儂愁一半多

方太古

六首

太古字元素蘭溪人有寒溪子集

吳之器藝書王文成嘗過太古擷蔬食之次日報謁亦以蔬進太古正色曰故人山人草具固爾伯安徹侯也胡爲乎山人具文成遂謝改治具嘗與唐文襄相失會文襄以太宰召貽詩曰世態經秋葉浮名下瀨船文襄爲之悵然其任放如此四友齋叢說孫太初過江人未有知者方寒溪一見大爲延譽太初詩格本高又儀狀軒舉丰神俊異後聲譽遂出寒溪之右田按太古負氣傲岸山澤俊人詩亦灑落不凡

夜坐喜晏伯謙談禪

海月未出山清宵起燈燭草坐借道流談禪暢幽獨雲岩一何深心遠境自足冷然忽成悟風吹隔窗竹

寒食

春光二月忽三月天氣單衣又夾衣樹樹梨花相對發家家燕子總雙飛客懷不慣逢寒食歸路還思住翠微溪上柳條新弄碧煖風晴日待儂歸

憶溪上梅花

去年冬早溪流淺重憶開時誰主張一樹隔簾雲弄影萬花回夢雪生香最多畫意山松閣占斷風情水竹莊何日歸來酬汝願小橋秀句放清狂

讀孫太初去冬所寄雜詩

發笥得詩肝肺熱山人與誰同住山碧雲行空月皎皎春風滿地花斑斑昔年鍼綫只自好今日門戶如子閒愛說輕身事修煉吾當爲汝解連環

玄墓山上方

危欄倦倚帶斜陽今夜禪床借上方七十二山何處是洞庭
烟水正茫茫

客散

客散書堂秋日涼山風吹雨葛花香竹床藤簟茶初熟消受
山人午睡長

程立輔一首

立輔字叔朋歙人

懷楊儀部君謙

故人久無書山川隔淮楚相思不可攜獨卧江東雨

朱曜一首

曜字叔暘松江華亭人以貢授清江鹽課提舉有玉
洲集

題陳清之畫

釣罷煙江發棹歌夕陽歸路柳風和明朝挾網來須早水漲
桃花魚正多

李孔修一首

孔修字子長順德布衣

霍韜渭崖集子長少從白沙游飄然鶴思不伍於世
破廬薄產蔬食不繼未嘗作皺眉作詩寫字自為一
家或觀眺山水間歸而圖之見者爭愛而酬之曰李
子長畫云平居管甯帽朱子深衣廿年足不越城闕
有古林逋魏野種放孺子雲卿之風子長父歿庶母
改適民家誣子長沒其產縣官繫鞠之子長無言追
之供操筆曰母告委是情真縣官疑之覆鞠得其情
乃知其賢禮敬之少年時輸糧於官縣官異其容止

詢姓名不答惟一拱手縣官叱曰何物百姓乃爾拱
手耶阿之退又再拱手縣官怒答之五竟無言以出
白沙先生知之戲之詩曰驢背推敲去君知我是誰
如何又兩手剛被長官答子長之詩曰月明海上開
尊酒花影船頭落釣蓑白沙亟稱之曰後廿年恐子
長無此句

遊西樵山

奇花不盡留春入宿雨纔收見月新閣外凌雲高去鳥山中

問道遠邀人

謝承舉 六首

承舉初名璿字文卿更字子象上元人有東村稿采

毫錄西遊錄在客稿日得錄廣陵雜錄湘中漫錄

顧璘息園存稿謝子象八歲善詩客命賦暮秋援筆
立就至紫塞風寒雁叫霜客驚嘆呼為奇童稍長從
吳元玉學見其深林下馬蒼苔滑野寺入門秋爽多
句擊節鑒賞柴墟儲靜夫為南考功作檀園詩社引

子象與諸文士聯句往往出奇絕眾常屈一座兄弟
四人各善詩畫風流清邁時擬謝安諸郎
金陵瑣事李著學畫於沈啟南學成歸家只做吳次
翁之筆以售緣當時陪京重次翁之畫故耳謝子象
題其畫云銀河無路泛仙槎一舸空江此是家殘月
照人秋睡穩不知清夢在蘆花
田按盛仲交合史癡翁金赤松詩為江南二隱稿子
象詩品當在二人之上癡翁赤松自以書畫重耳

月子河即景

風便小舸輕如葉中流浪平無驚嗟溪女捕魚水禽起野叟
賽神村鼓搗丹青剝壁見古廟雞犬上樹知人家秋江景物
看不厭霜菊挂岩開紫花

揚州馬次甫見過病中以詩道意

三百江程一日風又從橋口繫孤篷忽驚深巷來佳客不厭
寒門問病翁舊事多傷春鬢白好詩留翦夜燈紅階前即便

呼兒拜眼底誰人識馬融

夢中作

瓊瑤洲畔拾芙蓉玉女青童兩隊從
明月一江天似水夜涼騎鶴下西峯

睡起口占

茶瀾花磁洗睡魔枕流亭上暮涼多
狂飈吹下西山雨一片秋聲戀敗荷

送劉文獻

石城柳色春猶淺錦席燈花夜未分
分明發北風江棹穩思君又隔洞庭雲

寄何圖樵

山中酒熟君思我雪裏詩成我寄君
東望海門三百里不勝離思亂江雲

畫雁

湖上蘆黃水拍天湖頭人去少書傳
秋窗正有孤眠客莫送哀聲到枕邊

送蘇子升往萬川二首

荊州西去接夔門三峽波濤不可論
一曲驪歌臨別酒楚雲巴樹總銷魂

采石江頭芳草淒峨眉積畔曉猿嘯
扁舟穩泛桃花水好逐春風訪灤西

董漢二首

漢字復宗一字子濤海鹽布衣

樵李詩繫蘿石少慷慨慕義家貧工詩與沈周孫一元鄭善夫諸公遊放浪山水年六十八聞王陽明講學山中以杖肩瓢笠詩卷訪之入門長揖上坐陽明異其氣貌又知其為蘿石也與之語連日夜蘿石悚然起嘆執弟子禮盡棄舊學所游者謂之蘿石曰從吾所好而已更號從吾道人未復參證內典嘆曰今客始得歸矣與釋法聚結社海門山寺許相卿曰始余見從吾子專於詩遺其家甚難之後志於道遺其詩甚愧之終入於佛嗟然自遺也愈益怪之學三變而卒歸於空有詩云我非汗世中者傳偶來七十七春秋自知此去無些染一道天泉月自流其有得於道者歟

宿韜光次王明谷

看山意不盡信信宿禪家坐石雲生袖談經天雨花閣虛松
夜奏林煖筍秋芽老得王濛癖逢僧不厭茶

野眺

雲山重疊帶江邨花落水流天氣昏應有野人春卧穩流鶯
嘯過不開門

周恭一首

恭字寅之崑山人有和中峰梅花詩一卷樵玉稿十

卷

梅花主人歌

山迢迢兮溪曲曲中有人兮結茆屋玄鶴無聲兮花渺茫主人吹笛兮花斷腸

梅花草堂集周寅之自號梅花主人性嗜梅年四十始得數畝之宅週遭有池池立叢篠樹梅環之每寒日瞳瞳六花將笑香雲旣歛瘦影橫斜輒歌小辭樂之子嘗見沈啟南作梅花主人圖用梅花道人墨法卷高尺有咫而橫濶可一丈五七許矮屋壓頭野竹亂插成籬落屋外冷葦疏枝嫣然欲笑檐楞寒寂主

人坐其間隻袖垂膝有撚鬢苦吟之致門通曲徑徑接小橋隔水數峯亂插雲外山嵐隱現都潑青黛色散木叢立莽互不可辨一山勢峻而近峯極隱殿閣浮圖直倚霄漢宛然玉山風景躡屐問徑始可得梅花主人隱居所在啟南故不識主人主人嘗以詩為贄居然得之雖復一時弄翰彼此慕尚之情想其風格蓋亦翛然物外者耶

薛章憲一首

章憲字堯卿江陰人有鴻泥堂小稿八卷續稿十卷

遊張公洞

東家蹇驢許借我薄暮結客山中來有時山鳥獨自語無數
野花相映開側身蟻行人窸窣累足魚貫攀崔嵬僕夫起餐
覓歸路已去難忘首重迴

謝復一首

復字一陽祁門人有西山類稿五卷

山居

衰疾朝慵起荆扉午未開雲閒不飛去鳥倦自歸來果熟從
人摘松疏擬更栽狂歌白日永獨步前山隈

魏侗二首

侗字達卿鄞人以貢授石城訓導有雲松詩略

輓長清李處士

芒屨竹杖謝風煙江郭南頭卧一廬別館花開人醉酒小窗
月落客成篇誰圖栗里高風在惟有龍門盛會傳惆悵故人
思舊處數聲鄰笛夕陽天

少年行

丁巳卷十五
九
橐弓插羽氣如虹白馬翩翩過市中解射飛鵬向沙磧姓名
近報建章宮

倪復二首

復字汝新鄞人有畏齋稿

田按畏齋甫上者宿著書甚多詩亦琅琅雅音

讀史

飄風起末路日色無光輝猛虎厭獸肉騶虞恆苦飢羣狐處
中堂麒麟受羈縻陳寶竟火滅衣冠落塗泥上天杳且冥是
非何所咨古來共嘆息後世成著龜

感寓

風高殘暑清露白秋夜長蔓草不復滋蟪蛄弔流光繁思縻
中襟戚戚何能忘鸞刀未發劓割剝摧鋒鉞寶鏡匣中埋垢
汗何由明元運自淪忽白日去茫茫瑤華恐不實泯滅沈風
霜安得松柏姿歲寒色蒼蒼

史自守一首

自守字端仁鄞人

過石碑邨居

平原蔓草路橫斜寂寞依稀隱士家山檻雨霏歸燕子籬門
風輒落桐花床邊露滴春筍酒燈下塵飛夜碾茶白叟不知
京洛事瓦盆竹几樂年華

莫止四首

止字如山無錫人有南沙集

丁集卷十五
笛鳴小浦漁歌響淹留歸去遲月照蘆花港

寂照寺訪僧不遇

漫轉青蘿徑閒敲白板扉雲關僧已出煙樹鳥爭飛苔色侵
經案松枝挂衲衣深林獨回首空翠落霏霏

秋晚秣陵道中

匹馬迢迢度遠村荒林煙火漸黃昏路經秋水橋全沒山帶
寒雲樹半吞蘆渚風生樓鶯鶯柴門人靜聚雞豚秣陵極目
增歸思暮景蕭蕭易斷魂

天闕山居次海峯韻

石磴雲深路轉斜地臨天闕隔塵譁秋來信步閒尋寺曉起
科頭白灌花詩就小童知捧硯客來鄰叟爲供茶山林莫道

無交接門外時停長者車

錢百川一首

百川字東之無錫人有寒齋狂稿

盛明百家詩東之少年學琵琶半日度四十曲人以爲神解詞賦多不傳晚宗陳白沙

村晚

埜店啜沽酒江船爭買茶東風吹浩浩西日下斜斜緩步隨
流水狂歌踏落花欣然忘所去一笑過鄰家

陳蒙一首

蒙字允德常熟人有泛雪集

田按允德詩宗四明蘇秉衡七絕殊有標致

題石田翁贈朱守拙小景

野藤刺水竹籬斜落盡東風枳椇花日午不聞茶臼響春城
買藥未還家

田按王漁洋謂藥花入詩多新異歷紀陳白沙恰到
溪窮處山山枳椇花楊夢山記得任家亭子上連翹
花發共銜杯楊升菴滿城幾日黃梅雨開徧金釵石
斛花予謂允德野藤刺水竹籬斜落盡東風枳椇花
尤有風致也

聞笛

落盡梅花雪滿庭故園楊柳夢中青羌兒馬上傳來曲今夜
關山月裏聽

張鈇 一首

鈇字子威慈谿人有碧溪集

泊舟見桃花盛開

旅況託尊罍尊空愁更來人隨春燕去心與暮潮回驛鼓青
帆下橋燈水市開桃花明兩岸渾訝入天台

戴冠 一首

冠字章甫長洲人以貢授紹興府訓導有濯纓子集

嚴子陵墓

君臣垂令名千載不偶然先生固尚志光武亦下賢斯人化
去久清風播椒蘭灘水清見石客星長在天

徐岳 一首

岳福甯州人

福甯州志成化間有徐氏子名岳年七歲穎異過人
其父與客遊興慶寺客題詩壁上命岳和之岳題云
松竹寒仍秀梅花冷更香夜來三尺雪清曉玉爲堂

絕句

風雨惜春殘閒庭獨閉關白雲飛去後還我舊青山

王烈 二首

烈字正邦樂安人有尋樂集十卷

江西詩徵正邦性敏行篤鄉黨比之王彥方弘治中張東白薦修大明會典檄至而卒田按正邦詩有晚唐風致惜未得其全集錄之

遊桑林寺

江頭魚網雜魚竿江畔幽人度竹關香積飯餘飛鳥散瑤臺
經罷老僧閒懶雲不雨歸方丈小樹無枝著假山三笑桑林
眞落魄暮潮猶帶夕陽還

西隱寺

金輪峯畔舊招提曲徑幽通古木齊萬壑煙雲山遠近半空
樓殿路高低篠階斷地開花隴石礪分泉出稻畦鐘杵晝閒
禪意定竹風檐鳥盡情嘯

青山菴

一道橋橫碧澗流青山菴古白雲幽老松迸石矮遮屋修竹
接天高出樓日午麝香眠砌草風低翠羽泊簾鉤狂夫野趣
眞閑散半百浮生漫浪遊

晏良用 一首

良用初名才正字北山新喻人有北山漫稿

山中次韻

結屋依雲靜凭闌野興孤鶴聲煙樹遠人迹雨苔蕪歲月雙

蓬鬢溪山一酒壺老夫無俗累耕鑿是良圖

王鎰一首

鎰字美璞莆田人

蘭陵詩話美璞少有至性父母卒廬墓六年一夕樵人遺火燒山犬兩倏至草廬無恙又有雙虎馴擾於墓側人稱爲王孝子列朝詩集錄宮詞一首未詳字里不可不亟爲表揚也

夜坐

對月坐來久懷人詩不成誰家吹鐵笛偏送斷腸聲

邢參二首

參字麗文吳人有處士集

列朝詩集麗文嘉遯城市以著述自娛徐昌穀祝希哲皆尙之嘗遇雪累日囊無粟兀坐如枯株人往視之見其方苦吟誦所得句自喜昌穀爲作歌以申歡慕辭曰雲中鵠子鳴且蜚三三五五將焉歸歸在外

野獨徘徊從朝無梁暮不炊於何求乎蘆之漪我將往饋羹中魚將子不飢今我心愉

靜志居詩話麗文狷者除夜有海估以百金乞墓文峻拒之抱膝擁衣飢以待旦明初高侍郎季迪有北郭十友麗文亦有東莊十友吳燿次明文徵明徵仲吳奕嗣業蔡羽九達錢同愛孔周陳清道復湯珍子重王守履約王寵履仁張靈孟晉故其詩云昔賢重北郭吾輩重東莊背會誠難得同盟詎敢忘

題東禪璿公房

東城少僧寺賴此堪寄迹獨往路不迂嘗來意還適煖風逗鶯花宿雨滋燕麥不有高閑徒憑誰話今夕

寄朱性甫

坐探詩翁興不孤野航隨處勘新圖春風蒲柳鵝肫蕩夜月菱荷鶯脰湖兩地獨行堪貰酒一時相憶費操觚章涇流水清如渭泛覽何人爲接艫

姚旬一首

旬字用宣嘉興人丹邱先生綬子官鴻臚序班有觀

頤稿

錢福鶴灘集姚用宣詩宗杜字學沈民則以善書薦直仁壽殿

秋夜

水檻平添一尺波前溪坐見沒殘荷晚來雨過聞絡緯只有
荳花棚上多

吳玘一首

玘字鳳翔無錫人

送秦大參廷韶之閩

膏車秣馬促晨興且盡離筵酒數升賸有才名繼常袞可無

詩句弔嚴陵春耕農畝勞行部夜坐人家不禁燈別後有懷
空仰止閩山高出白雲層

鄭達一首

達襄陽人崑山知縣

新燕

東風庭院柳飛花補得新巢日已斜莫把新愁向人說長安
有客正思家

羅周一首

周字汝濟紹興山陰人處士絃子有梅隱稿十八卷

荔枝山鳥

雨過蠻溪歛瘴煙腥紅萬顆壓枝鮮誰知山鳥偷銜去又是

紅塵一騎前

崔澂一首

澂字淵甫吳江人國子監生有傳響集

靜志居詩話淵甫年未三十而天當其存日楊君謙
吳原博李貞伯都元敬沈啟南周伯器史明古諸君
皆與訂忘年之交原博尤重之呼為崔小先生云集
中和庚詩多至三百七十餘首恪守唐人矩矱而未
成變化使假之年當不止是此諸君重為悼惜也

秋雁


迢遞辭邊塞聯翩入楚鄉江深空見影天闊遠成行暮雨愁
增繳秋風足稻梁數聲何處落應斷客中腸

趙善諫一首

善諫字景行廣州順德人有閑言集


漁人

浦口鳴榔急清江水漫流得魚便沽酒明月在扁舟



丁亥卷十三

三



明詩紀事

貴陽陳田輯

丁籤

杭濟一首

濟字世卿宜興人弘治癸丑進士授吏部主事歷員外郎中出為福建提學副使歷參政終布政使有澤西集

梅花卷

暗香疏影詩人句小閣春風畫裏看彷彿西湖冰雪裏一枝清瘦不勝寒

杭淮七首

淮字東卿濟弟弘治己未進士授刑部主事歷員外

出為浙江按察僉事進副使改山東又改雲南歷湖

廣按察使山東河南布政使擢南太僕卿以都察院

右副都御史總督南京糧儲有雙溪集八卷

四庫總目淮與兄濟並負詩名與李夢陽徐禎卿王守仁陸深諸人遞相倡和其詩格清體健在弘治正德之際不高談古調亦不沿襲陳言頗諧中道

遵嚴集雙溪詩雖裁製錯出律調不同歸之嚴整雅健體高而意正者舒而節越有前世作者之風

靜志居詩話雙溪詩極其道鍊如繭絲抽自梭腸似澀而有條理五言尤擅場可亞少谷

田按東卿詩不事叫囂自饒古格在七子派中與大復昌穀為近

送王文熙守制還家

昏入燕關道草色青已齊
驥裏君馬白絡首南向嘶
倉皇攬

衣裳起餞不可攜
別離亦已惡
矧子在哀迷
慘澹春日暮
淚

落黃山溪

見李介菴卷因念其人賦此詩

濯濯楊柳枝
開花大江隄
轉盼春風顛
飄泊岸東西
美人隔

江水何當共襟期
臨流和漁歌
褰裳掇江蘼
思之不可即
仰

視白日馳玄髮
日已變夕惕
恆自持願將青青柏
遺君長相

思

再過浪滄橋

西行每濟此神魂
欲驚飛下俯千尺
濤橋柱浮傾
欹捍聯四

鐵鎖歲久恐不持
仰視壁巉竦
上與浮雲齊
霾日午氣昏
挂

藤猿臂垂下馬為歛足
俯仰立嗟咨
大江從西來
萬派通番

夷兩崖似束縛不敢爲四馳
天空木葉下長風吹我衣
蒼茫絕域晚躑躅遊子悲

襄陽習池

青山愛峴首春風還習池
尙想山翁醉惟遺羊子祠
巖花落冉冉江柳垂
絲絲亭臺斜日落今古一長咨

送李獻吉餉軍甯夏

塘南淺淡野蓮白塘北高低秋蓼紅
思君只在別君處跨馬時來月明中

送錢水部致仕還無錫

張公洞深白日裂吳溪水煥青蘋香
夢中風土亦不惡他日與君俱故鄉

李少宰蒲汀送蟹兼有詩

江郭經霜正爾思青蒲束縛到堦墀
開詩先已知風味不在持螯對酒時

韓邦奇一首

邦奇字汝節朝邑人正德戊辰進士
除吏部主事歷員外言事謫平陽通判
遷浙江僉事以裁抑中官下詔獄
斥爲民起山東參議改山西乞休
起四川提學副使入爲春坊右庶子
謫南太僕丞起山東副使歷大理丞
進少卿以右僉都御史巡撫遼東
改山西引疾歸起故官督進右副都
御史巡撫遼東改山西引疾歸起故官
督河道遷刑部侍郎改吏部拜南右都
御史進兵部尙

書參贊機務致仕歸陝西地震死贈太子少保諡恭

簡有苑洛集二十二卷

四庫總目當正嘉之際北地信陽方用其學提唱海內邦奇不相附和以著書餘事發為文章不必沾沾求合於古人而記問淹通凡天官地理律呂數術兵法之屬無不博覽精思得其要領
田按正德中汝節官浙江僉事時中官採富陽茶魚為民害汝節作富陽謠哀之云富陽江之魚富陽山之茶魚肥賣我子茶香破我家采茶婦捕魚夫官府拷掠無完膚昊天胡不仁此地亦何辜魚胡不生別縣茶胡不生別都富陽山何日摧富陽江何日枯山摧茶亦死江枯魚始無山難摧江難枯我民不可蘇中官王堂奏汝節阻格上供作歌怨謗帝怒逮至京下詔獄斥為民

送錢銀臺自考功之南都

功天部客長嘯出春明祖席開燕閣繁花發帝城晚風催
照行旌聖主思弘化還應召賈生

韓邦靖 六首

邦靖字汝慶邦奇弟同榜進士授工部主事遷員外
應詔陳言繫錦衣獄奪職為民起故官擢山西參議

有五泉集

苑洛集王九思曰五泉子七言絕句類杜子美古詞歌浸淫唐初逼漢魏
列朝詩集汝慶才藻爛發田按五泉子七古摹初唐極富才情五言亦窺盛唐格律惟早傷萎折未見其止

玄明宮行

長安送客城東道柳葉楊花春正早玄明宮前下馬時一片
煙光幕青草宮中道士邀我入素菓清茶日未昃白河東下
楚城西指點湖山三歎息正德三年與四年劉瑾專權斧展

前可憐帝主推心腹縱有邱張豈比肩帷幄空多戚里恩論
思無復侍臣尊千官盡走東河下庶政全歸左順門震主傾
朝不自知回天轉日更誰疑金貂滿座銜恩日朱紱升堂頌
德時翻嫌仇李光榮薄卻笑曹侯意氣卑謀生已拙還謀死
更起玄明作葛里甲第侯王已莫倫陰山將相那堪比土石
西山半欲摧棟梁南國萬牛回虛閣平臨金闕杪假山下指
鳳城隈琪花瑤草尋常得萬戶千門次第開千門萬戶何透
迤玉鼎瓊几更絕奇金人兩兩坐相向錦石亭亭立不危崇
垣豈止行干堵佳樹俄看大十圍玄明之宮高莫匹四海京
師皆第一金盃常思埋甲盾銅駝不解生荆棘自古威權不
到頭九重一怒罪人收幾年烈焰俱灰滅一旦冰山作水流

冰山烈焰事俱非座上門前客盡稀須臾蔓草縈枯骨宛轉
佳城屬羽衣門掩官河十里長山藏隴樹一千行今古誰存
三尺土姦雄空作百年忙春風有燕時雙入寒食何人奠一
觴低雲拂翠迷寒柳愁雨沾花落晚香臥牛不得歸岡勢怨
鶴空聞繞夕陽夕陽漠漠鶴歸遲卻憶玄明全盛時千人舉
杵萬人和九仞爲臺十仞池雨露霜霾歸喜怒層青丹碧豈
珍奇萬民累足臣屏息四海離心主不知倚社難薰古如此
操刀必割誰能已三穴那能窮帝旁萬幾况復歸司禮救枉
扶偏本不同更張琴瑟始成功還期聖主思前事莫遣玄明
有別宮一興一敗一登臨千樹千花笑古今崢嶸乍可誇豪
傑轉眼繁華日易沈

田按立明官行自以空同大復爲連璧汝慶此作亦其亞也

送謝屯部之湖廣

謝子同官久春深獨遠行山花孤棹發江草旅愁生桂嶺通巴國岷江接漢城登臨雲日暮何處是神京

送馬欽湖先生

當代文章客如君生事微功名殊未達湖海意多違行色萌春柳江聲轉夕暉荆襄全盛地努力莫思歸

關中

蜀寇金州入邊兵鐵騎連風塵迷故國消息斷殘年劍月明三輔烽雲散八川西征推總制勿使聖心懸

葉家樓

武皇北巡曾此駐蹕

一曲朱欄倚綠楊葉家樓閣本尋常曾看萬國來佳麗不信當年駐帝皇花繞香雲還五色草和秋露但斜陽江南江北無窮恨八駿原誰馭穆王

春興

十里晴烟散薜蘿輕寒乍煖試清和柳眉杏臉桃花淚各有春愁誰最多

方鵬

一首

鵬字時舉崑山人正德戊辰進士授南禮部主事改南刑部歷員外郎中改南兵部吏部出爲浙江參議歷山西副使用薦改右春坊右庶子兼翰林修撰遷南太常卿有矯亭存稿十八卷續稿八卷

方鳳改亭續稿矯亭詩文平實典雅
靜志居詩話矯亭古詩効陶近體學白頗饒自得之
趣其自題小像云此像何人斯吳淞方矯亭頗記前
身事生可六七齡一疾遽天死天地為冥冥蒼頭抱
我哭諸婦痛拊膺其家乃城居面北高檐楹臨街列
屠沽陰風助哀聲思之宛如昨語及輒涕零性靈想
不寐還復得此生乃知記憶前身事匪獨鮑井羊環
也

秋野

涼雨經旬暑盡消
荻花楓葉暗溪橋
深深門菴迴車馬浩浩
江湖隔市朝
滿地稭稭喧鳥雀
幾家煙火混漁樵
非無使者
弓旌在水闊雲多不可招

方鳳 六首

鳳字時鳴鵬弟同榜進士除行人遷監察御史有改
亭存稿十卷續稿六卷

田按改亭詩不事摹擬自饒香色

晚泊安陵

輕艫依樹泊小店
枕流開城柝歸鴉
散牆燈宿鷺猜風狂欺
客鬢酒薄減詩才
怕是微茫月將愁入夢來

乘月登矯翁新疊山

有山不必論真假
無客還須自主賓
小洞著雲梅雨細
方池
皺綠竹風勻一奩
短髮閒邱壑
半世高吟伴葛巾
此夜躋攀
窮醉眼露華清
淡月如銀

約段同年石庵游西湖

耿耿懷人百里心
野塘秋水碧沈沈
功名染指春雲薄
尊酒
論文夜雨深
白髮無情空貯藥
青山隨處可攜琴
翩翩野服

乘新霽好向西湖續舊吟

送湯二尹歸兼簡彭子充

五袴歌謠滿路歧何來蕙苒忽生疑吳田春水留遺跡蜀道
寒雲感去思枳殼花飛風翦翦木蘭舟發雨絲絲詩壇若見
彭夫子為說方干有夢馳

輓全虛舟

泛泛虛舟隨處泊伴雲出去伴雲還詩狂酒興今何在月戶
風簾夜不關心事要論心迹外生涯長在有無間若知羽化
真消息不用臨風兩淚潸

秋江

獨臥滄江秋已遲可無新酒伴新詩生涯只在荻花渚日日

尊鱸不用思

傅汝舟七首

汝舟字木虛一名舟侯官人有前邱生行已外編七

幅菴草吳游記唾心集步天集英雄失路集拔劍集

篋篋集吟藝存卷棄存稿烏衣燕子諸集

少谷集傅生詩淵致蕭散多發之性情其道江湖林壑神仙隱逸直臻其要妙上下魏晉抗聲於武德天寶之間大歷而還不論也藝苑厄言傅汝舟詩如言法華作風話凡多聖少小草齋詩話鄭繼之同時倡和諸子有傅山人汝舟高山人漱林侍御紙許黃門天錫然皆格卑語俚不能自振獨傅差有塵外之語如松花風送時入口竹杖雲生常滿衣永夜松風掃星月經旬衾枕傍天河天風驅雲不出洞家鶴拜客時登堂亦自蹀躞可喜李維禎大泌山房集遠度愜言七子如徐吳有氣體無神骨近日袁中郎輩反是婁江歷下互有短長列朝詩集徐興公曰汝舟詩雖師鄭吏部而天然之

趣尤勝如雖貧一榻能高臥縱老名山欲遠尋焚香
漫與僧來往得句惟應弟唱酬郊原亂後飛燐火村
落年來變劫灰異書自得作者意長劍不借時人看
呼來鷓鴣添新侶拋去鷓鴣省舊糧新點玉書仙賜
讀舊趨瓊闈帝容歸等句吏部當爲御步
聞書武夷天心峰在火燄峰右象鼻巖左三峰屈曲
毗連如心字之形又此地深隱爲洞天中心嘉靖戊
子徽人韓洞虛鑿荒構屋張真人彥頤扁曰天心傅
汝舟詩朝登三仰峰夕宿天心庵久入名山遊溪徑
頗盡諸始知九曲外復有南山南森邃更險豁深篁
倚煙嵐沙田稻翼翼巖桂花麤麤疏籬隔雞犬朽樹
藏蜂蠶

初度

明朝初度至覽髮奈年何歲旱龍無語吾衰鳳不歌巖齋孤

對海石樹絕攀蘿莫怪違時性山林自一科

登襄城

客子道路浮雲輕北風發發飄蠻荆二如漢濱昔解佩龐公

襄陽今入城天清峴山水上出日倒習池花內明錯將玉笛

與此弄盡使九天鸞鶴驚

擬築宛在堂奉招石門隱君

城外西湖煙霧光孤山宛在水中央門開獨樹懸青磴徑繞

千花上碧堂蘭艇桂檣操自穩藥房荷榻臥偏長秋波不隔

尋眞路乘興須君到隱鄉

陪汪郡公謁勉齋先生墓

先生墳在庖犧谷異代虛無草木閒俎豆自今開特廟衣冠

終古闕空山峰高元氣長回合地迴精靈定往還淺薄叨陪
堂下拜幾瞻遺像愧塵顏

杜清碧故宅

不見平川杜伯原社煙村靄自朝昏徵君故宅遙相問去國
微言竟莫存世亂冠裳終草莽年深鄉井少兒孫清江碧嶂
愁看汝夜雨寒燈夢掩門

送張文寺遊西湖

當年自署西泠長近把蒲觴作臥遊寄語孤山雙白鶴主人
歸矣不須愁

山居

竹下焚香對玉屏春風池上酒初醒閒箋一卷長生訣解與

溪南白鶴聽

傅汝楫 一首

汝楫字木剡汝舟弟有臥芝集

閉門

頻年罷釀老愛酒客至無錢強出賒落盡庭梅三日雨香風
閒對一甌茶



明詩紀事

貴陽陳田輯

張詩 三首

丁籤

詩字子言本姓李宛平人有崑崙山人集

中麓間居集崑崙山人張詩在大梁與李空同歌詩
酬贈空同稱為燕山豪士夜宴瓶芝忽墮以為梓行
觴焉亦一奇事也與空同各作芝盤行俱有李杜風
骨孫太初作詩贈山人有張子自高格入山從我遊
山人怒曰吾豈汝門弟子耶從此絕交
今兩瑤華崑崙山人鑲金刻玉咀鳳含麟
漫藝苑卮言張子言詩如甘州石斗色澤如玉膚理麤

列朝詩集崑崙山人在武林時與孫太白論詩太白
自誇其青厓貼天日下照芝草斑之句不減曹氏父
子子言掉頭大笑太白為之奪氣子言笑謂坐客今
日崑崙山壓倒太白矣

田按山人詩亦有奇致以較太初去之尚遠李開先推之過甚何耶

都下贈秦餘岳子

山色隨龍劍何時別五湖風塵萬人裏鸞鳳一身孤足躡煙霞具腰盤海嶽圖三秋今獨見莫惜倒金壺

崔西峩山中別起樓臺寄贈

山人習靜謝氛埃甲第遙從天上開流水自然成澗壑閒雲終日護樓臺珠簾度鶴窺金篆壁月穿花送玉杯鞭石不勞蓬島去吹簫時引鳳凰來

贈答秦餘寄山水畫圖

秦餘山人鸞鶴姿遙探江海躡靈芝醉圖萬疊丹邱狀樹是琳瑯瑤作池

鄭作二首

作字宜叔歛人有方山子詩選

空同集方山子詩才敏興速援筆輒成空同子每抑之日不精不取乃兀坐沈思鍊句證體亦往往入格靜志居詩話宜叔詩頗俊利遠勝五岳山人

逢徐少卿

八年方把袂萬里只含情已自忘顏面猶能記姓名深杯照落日寒葉動秋聲獨愧飛蓬影飄飄過此生

柬汪用夫

我歸嶺嶠雲生履君汎江天雪滿船離思不堪還異地鄉愁無奈況殘年海鷗笑客時能去山鬼吹燈夜不眠一棹沙溪明月靜漁竿相把釣寒煙

程誥 三首

誥字自邑歙人有霞城集二十四卷

列朝詩集自邑居於汭溪自號汭溪山人杖策遊華山從李獻吉遊酬和於繁吹兩臺之間黃勉之諸人北學於空同者皆以自邑為介然其詩殊有風調

東風

南郡非吾土東風慰久稽
看花中酒後羸馬故城西
郢樹連襄遠巴山到楚低
王孫歸未得芳草自萋萋

咏史

易水長虹白將軍首入秦
荆軻無劍術不是報讐人

送芸上人

行盡春山翠萬重新林浦
月坐聞鐘橫江東去長鳴鶴巢寄

南朝第幾松

戚韶 一首

韶字龍囷松江華亭人有集

松風餘韻龍囷好古博雅與王良佐張冕並以詩名孫文簡公初不深識龍囷作二詩送之北上文簡合良佐與冕之詩並刻之曰三詩翁集

記事

人情洶洶語浮聳腹裏千愁豈易消
戰艦未收河朔賊居民
虛斷灞西橋天須向曙星初滅
樹未經秋葉已飄不似十年前
前意況青樓明月喚吹簫

姜玄 一首

玄字玄仲吳江人

列朝詩集立仲詩務雅澹極意陶鍊每成一詩輒復捐去著思再三芒藻幾盡不為時流所知蓋詩家之逸民也

雜詩

諷討窮修暑頗悅古人情周楚先河濫漢晉浩波橫吐吞煙霞混組繡陽春生妙化猶九轉巧拙非一程隋侯自朗瑩和氏自溫明既使瓠瓠競又俾魚目爭所以絕琴者千載不復鳴

童季一首

季字廷季蘭溪人自號耕樂子有耕樂子集

送蕭貴襄歸江西

白苾涼生八月秋尊鱸歸興滿扁舟風塵動是經年別尊酒

難為十日留紅葉關河添客況黃花驛路使人愁從知此後思君處多在斜陽古渡頭

趙香一首

香字水巖東陽人

弔杜少陵

往事淒涼傷客心少陵遺蹟此沾襟百年多難悲鄉國萬里長吟動古今秦地秋風茅屋破巴山落日草堂陰乾坤何處孤舟寄江漢蕭蕭暮雨深

童璫一首

璫字汝器蘭溪人貢生官東平同知

華溪

華溪釣隱誠自豪齊門操瑟非吾曹
綸竿百尺水雲渺鐵篴一聲山月高
放鶴引尋紫芝洞得魚醉臥滄江濤
黃塵滿地不歸去萬里天風吹布袍

陳璽一首

璽字德符閩人有守魯集

爲介菴叔父題畫屏

雪漫江天萬木落一間茅屋覆詩翁
何人醉醒梅花月踏徧寒山路幾重

